

白氏長慶集

關化圖書館

Kaohsiung Library

開化圖書館

Kaithua library

開化圖書館

Kaichua library

開化圖書館

Kaichua library

白氏文集卷第五十六

律詩 五言 七言 凡一百首

大和戊申歲大有年詔賜百寮出城  
觀稼謹書盛事以俟采詩

清晨承詔命豐歲閱田閭膏雨抽苗足涼  
風吐穗初早禾黃錯落晚稻綠扶疎好入  
詩家詠宜令史館書散爲萬姓食堆作九  
年儲莫道如雲稼今秋雲不如

贈悼懷太子挽歌辭二首

竹馬書薨歲銅龍表葬時永言窀穸事全  
用少陽儀壽夭由天命哀榮出聖慈恭聞  
褒贈詔軫念在羣夷

又一首

剪葉藩封早承華冊命尊笙歌辭洛苑風  
雪蔽梁園鹵簿凌霜宿銘旌向月翻宮寮  
不逮事哭送出都門

雨中招張司業宿

過夏衣香潤迎秋簟色鮮斜支花石枕卧

詠藥珠篇泥濘非遊日陰沉好睡天能來  
同宿否聽雨對牀眠

和集賢劉學士早朝作

吟君昨日早朝詩金御爐前喚仗時煙吐  
白龍頭宛轉扇開青雉尾參差暫留春殿  
多稱屈合入綸闈即可知從此摩霄去非  
晚鬢間未有一莖絲

送陝州王司馬建赴任

陝州司馬去何如養靜資貧兩有餘公事

閑忙同少尹料錢多少敵尚書祇攜美酒  
爲行伴唯作新詩趁下車自有鐵牛無詠  
者料君投刃必應虛

對琴待月

竹院新晴夜松窗未卧時共琴爲老伴與  
月有秋期玉軫臨風久金波出霧遲幽音  
待清景唯是我心知

楊家南亭

小亭門向月斜開滿地涼風滿地苔此院

好彈秋思處終須一夜抱琴來

早寒

黃葉聚牆角青苔圍柱根  
被經霜後薄鏡  
遇雨來昏半卷寒簷幕  
斜開煖閣門迎冬  
兼送老祗仰酒盈樽

齋月靜居

病來心靜一無思  
老去身閑百不爲  
忽忽眼塵猶愛睡  
些些口業尚誇詩  
葷腥每斷齋居月  
香火常親宴坐時  
萬慮消停百神

泰唯應寂寞殺三尸

宿裴相公興化池亭

林亭一出宿風塵  
忘却平津是要津  
松閣晴看山色近  
石渠秋放水聲新  
孫弘閣闕無閑客  
傅說舟忙不借人  
何似掄村濟川外  
別開池館待交親

和劉郎中望終南山秋雪

遍覽古今集都無  
秋雪詩陽春先唱  
後陰嶺未消時草  
訝霜凝重松疑鶴  
散遲清光

莫獨占亦對白雲司

廣府胡尚書頻寄詩因答絕句

尚書清白臨南海雖飲貪泉心不回唯向  
詩中得珠玉時時寄到帝鄉來

送鶴與裴相臨別贈詩

司空愛爾爾須知不信聽吟送鶴詩羽翮  
勢高寧惜別稻梁恩厚莫愁飢夜棲少共  
雞爭樹曉浴先饒鳳占池穩上青雲勿迴  
顧的應勝在白家時

令狐相公拜尚書後有喜從鎮歸朝  
之作劉郎中先和因以繼之

車騎從新梁苑廻履聲珮響入中臺鳳池  
望在終重去龍節功成且納來金勒最宜  
乘雪出玉觴何必待花開尚書首唱郎中  
和不計官資祇計才

送河南尹馮學士赴任

石渠金谷中間路軒騎翩翩十日程清洛  
飲冰添苦節碧嵩看雪助高情謾誇河北

操旄鉞莫羨江西擁旆旌何似府寮京令  
外別教三十六峯迎

讀鄂公傳

高卧深居不見人功名斗數似灰塵唯留  
一部清商樂月下風前伴老身

賦得烏夜啼

城上歸時晚庭前宿處危月明無葉樹霜  
滑有風枝啼澁飢喉咽飛佢凍翅垂畫堂  
鸚鵡鳥冷暖不相知

鏡換盃

欲將珠匣青銅鏡  
換取金樽白玉卮  
鏡裏老來無避處  
樽前愁至有消時  
茶能散悶  
爲功淺  
萱縱忘憂得力遲  
不似杜康神用  
速纜分一盞  
便開眉

冬夜聞蟲

蟲聲冬思苦  
於秋不解愁  
人聞亦愁我  
是老翁  
聞不畏  
少年莫聽白君頭

雙鸚鵡

綠衣整頓雙棲起紅紫分明對語時始覺  
琵琶絃莽鹵方知吉了舌參差鄭牛識字  
吾常歎丁鶴能歌爾亦知若稱白家鸚鵡  
鳥籠中兼合解吟詩

贈朱道士

儀容白晢上仙郎方寸清虛內道場兩翼  
化生因服藥三尸餓死爲休糧醮壇北向  
宵占斗寢室東開早納陽盡日窻間更無  
事唯燒一炷降真香

昨以拙詩十首寄西川杜相公相公  
亦以新作十首惠然報示首數雖等  
工拙不倫重以一章用伸答謝

詩家律手在城都權與尋常將相殊剪截  
五言兼用鉞陶鈞六義別開鑪驚人卷軸  
須知有隨事文章不道無篇數雖同光價  
異十魚目換十驪珠

和令狐相公新於郡內栽竹百竿拆  
壁開軒旦夕對翫偶題七言五韻

梁園脩竹舊傳名久廢年深竹不生千畝  
荒涼尋未得百竿青翠種新成牆開乍見  
重添興窻靜時聞別有情煙葉蒙籠侵夜  
色風枝蕭颯欲秋聲更登樓望尤堪重千  
萬人家無一莖

重答汝州李六使君見和憶吳中舊

遊五首

爲憶娃宮與虎丘翫君新作不能休蜀牋  
寫出篇篇好吳調吟時句句愁洛下林園

白集五十六  
終共住江南風月會重遊由來事過多堪  
惜何況蘇州勝汝州

見殷堯藩侍御憶江南詩三十首詩  
中多叙蘇杭余嘗典二郡因繼和之  
江南名郡數蘇杭寫在殷家三十章君是  
旅人猶苦憶我爲刺史更難忘境牽吟詠  
真詩國興入笙歌好醉鄉爲念舊遊終一  
去扁舟直擬到滄浪

聞新蟬贈劉二十八

蟬發一聲時  
槐花帶雨枝  
祇應催我老  
兼遣報君知  
白髮生頭速  
青雲入手遲  
無過一盃酒  
相勸數開眉

贈王山人

玉芝觀裏王居士  
服氣飡霞善養身  
夜後不聞龜喘息  
秋來唯長鶴精神  
容顏盡恠長如故  
名姓多疑不是真  
貴重榮華輕壽命  
知君悶見世間人

和劉郎中學士題集賢閣

朱閣青山高庠齊與君才子作詩題傍聞  
大內笙歌近下視諸司屋舍佷萬卷圖書  
天祿上一條風景月華西欲知丞相優賢  
意百步新廊不踏泥

觀幻

有起皆因滅無睽不暫同從歡終作感轉  
苦又成空次第花生眼頃臾燭過風更無  
尋覓處鳥跡印空中

病假中龐少尹攜魚酒相過

宦情牢落年將暮病假聯絲日漸深被老  
相催雖白首與春無分未甘心閑停茶椀  
從容語醉把花枝取次吟勞動故人龐閣  
老提魚攜酒遠相尋

聽田順兒歌

憂玉敲冰聲未停嫌雲不過入青冥爭得  
黃金滿衫袖一時拋與斷年聽

聽曹剛琵琶兼示重蓮

撥撥絃絃意不同胡啼番語兩玲瓏誰能

截得曹剛手，挿向重蓮衣袖中。

酬令狐相公春日尋花見寄六韻

病卧帝王州，花時不得遊。  
老應隨日至，春肯爲人留。  
粉壞杏將謝，火繁桃尚稠。  
白飄僧院地，紅落酒家樓。  
空裏雪相似，晚來風不休。  
吟君悵望句，如到曲江頭。

和劉郎中曲江春望見示

芳景多遊客，衰翁獨在家。  
肺傷妨飲酒，眼痛忌看花。  
寺路隨江曲，宮牆夾樹斜。  
羨君

猶壯健不枉度年華

送東都留守令狐尚書赴任

翠華黃屋未東巡  
碧洛青嵩付大臣  
地稱高情多水竹  
山宜閑望少風塵  
龍門即擬爲遊客  
金谷先憑作主人  
歌酒家家花處處  
莫空管領上陽春

自題新昌居止因招楊郎中小飲

地偏坊遠巷仍斜  
最近東頭是白家  
宿雨長齊鄰舍柳  
晴光照出夾城花  
春風小榼

三升酒寒食深爐一椀茶能到南園同醉  
否笙歌隨分有些些

南園試小樂

小園班駁花初發新樂錚攄教成紅萼  
紫房皆手植蒼頭碧玉盡家生高調管色  
吹銀字慢拽歌詞唱渭城不飲一盃聽一  
曲將何安慰老心情

和微之春日投簡陽明洞天五十韻  
青陽行已半白日坐將徂越國強仍大稽

城高且孤利饒鹽煮海名勝水澄湖牛斗  
天垂象台明地展圖瓌奇埴市井佳麗溢  
闔閭勾踐遺風霸西施舊俗姝船頭龍夫  
矯橋脚獸睢盱鄉味珍彭越時鮮貴鷓鴣  
語言諸夏異衣服一方殊搗練蛾眉婢鳴  
榔娃角奴江清敵伊洛山翠勝荆巫華表  
雙棲鶴聯牆幾點烏煙波分渡口雲樹接  
城隅澗遠松如畫洲平水似鋪綠秧科早  
稻紫笋拆新蘆暖踏泥中藕香尋石上蒲

雨來萌盡達雷後蟄全蘇柳眼黃絲類花  
房絳蠟珠林風新竹折野燒老桑枯帶鞞  
長枝蕙錢穿短貫榆暄和生野菜卑濕長  
街蕪女浣紗相伴兒烹鯉一呼山魃啼稚  
子林狔挂山都產業論蠶蟻孳生計鴨鵝  
泉巖雪飄灑苔壁錦漫糊堰限舟航路堤  
通車馬途耶溪岸迴合禹廟徑盤紆洞穴  
何因鑿星槎誰與剗石凹仙藥白峯峭佛  
香爐去爲投金簡來因挈玉壺貴仍招客

宿健未要人扶聞望賢丞相儀形羨丈夫  
前驅駐旌旆偏坐列笙竽刺史旃翻隼尚  
書履曳鳧學禪超後有觀妙造虛無髻裏  
傳僧寶環中得道樞登樓詩八詠置硯賦  
三都捧擁羅將綺趨蹌紫與朱廟謀藏稷  
高兵略貯孫吳令下三軍整風高四海趨  
千家得慈母六郡事嚴姑重士過三哺輕  
才抵一銖送觥歌宛轉嘲妓笑盧胡佐飲  
時炮鼉蠲醒數鱸鱸醉鄉雖咫尺樂事亦

須臾若不中賢聖何由外智愚伊予一生  
志我爾百年軀江上三千里城中十二衢  
出多無伴侶歸只對妻孥白首青山約抽  
身去得無

酬鄭侍御多雨春空過詩三十韻

南雨來多滯東風動即狂月行離畢急龍  
走召雲忙鬼轉雷車響蛇騰電策光侵滯  
天似漏沮洳地成瘡慘澹陰烟白空濛宿  
霧黃闇遮千里目悶結九迴腸寂寞羈臣

館深沉思婦房鏡昏鸞滅影衣潤麝消香  
蘭濕難紉珮花凋易落粧沾黃鸞翅重滋  
綠草心長紫陌皆泥濘黃污共森茫恐霖  
成恠沴望霽劇禎祥楚柳腰肢鞞湘筠涕  
淚滂晝昏疑是夜陰盛勝於陽居士巾皆  
墊行人蓋盡張跳蛙還屢出移蟻欲深藏  
端坐交遊廢閑行去步妨愁生垂白叟惱  
殺踏青娘變海傷湏慮爲魚慎勿忘此時  
方共懼何處可相將已望東溟禱仍封北

戶穰却思逢旱魃誰喜見商羊預怕爲蠶  
病先憂作麥霜惠應施浹洽政豈假揄揚  
祀典脩咸秩農書振滿牀丹誠期懇苦白  
日會昭彰賑廩賙飢戶苦城備壞牆且當  
營歲事寧假惜年芳德勝令災弭人安在  
吏良尚書心若此不枉繫金章

和春深二十首

何處春深好春深富貴家馬爲中路鳥妓  
作後庭花羅綺驅論隊金銀用斷車眼前

何所苦唯苦日西斜

又一首

何處春深好春深貧賤家荒涼三逕草冷落四鄰花奴困歸傭力妻愁出貨車途窮平路險舉足劇褒斜

又一首

何處春深好春深執政家鳳池添硯水雞樹落花詔借當衢宅恩容上殿車延英開對火門與日西斜

又一首

何處春深好春深方鎮家通犀排帶胯瑞  
鶻勘袍花飛絮衝毬馬垂楊拂妓車戎裝  
拜春殿左握寶刀斜

又一首

何處春深好春深刺史家陰繁棠布葉岐  
秀麥分花五匹鳴珂馬雙輪畫戟車和風  
引行樂燁燁隼旗斜

又一首

何處春深好春深學士家鳳書裁五色馬  
鬣剪三花蠟炬開明火銀臺賜物車相逢  
不敢揖彼此帽佷斜

又一首

何處春深好春深女學家慣看溫室樹飽  
識浴堂花御印提隨仗香牋把下車宋家  
宮樣髻一片綠雲斜

又一首

何處春深好春深御史家絮縈驄馬尾蝶

繞繡衣花破柱行持斧埋輪立駐車入班  
遙認得魚貫一行斜

又一首

何處春深好春深遷客家一杯寒食酒萬  
里故園花炎瘴蒸如火光陰走似車爲憂  
鵬鳥至祗恐日光斜

又一首

何處春深好春深經業家唯求太常第不  
管曲江花折桂名慙却收螢志慕車官場

泥鋪處最怕寸陰斜

又一首

何處春深好春深隱士家  
野衣裁薜葉山飯曬松花  
蘭索紉幽珮蒲輪駐軟車  
林間箕踞坐白眼向人斜

又一首

何處春深好春深漁父家  
松灣隨棹月桃浦落船花  
投餌移輕楫牽綸轉小車  
蕭蕭蘆葉裏風起釣絲斜

又一首

何處春深好春深潮戶家  
濤翻三月雪浪噴四時花  
曳練馳千馬驚雷走萬車  
餘波落何處江轉富陽斜

又一首

何處春深好春深痛飲家  
十分盃裏物五色眼前花  
鋪歆眠糟甕流涎見麴車  
中山一沉醉千度日西斜

又一首

何處春深好春深上巳家  
蘭亭席上酒曲洛岸邊  
花弄水游童棹湔裾小  
婦車齊撓爭渡處一匹  
錦標斜

又一首

何處春深好春深寒食家  
玲瓏鏤雞子宛轉綵毬花  
碧草追遊騎紅塵拜掃車  
鞦韆細腰女搖曳逐風斜

又一首

何處春深好春深博奕家  
一先爭破眼六

聚鬪成花鼓應投壺馬兵衝象戲車彈碁  
局上事最妙是長斜

又一首

何處春深好春深嫁女家紫排襦上雉黃  
帖鬢邊花轉燭初移障鳴環欲上車青衣  
傳氈褥錦繡一條斜

又一首

何處春深好春深娶婦家兩行籠裏燭一  
對扇間花賓拜登華席親迎障幘車催粧

詩未了星斗漸傾斜

又一首

何處春深好春深妓女家  
眉欺楊柳葉裙妬石榴花  
蘭麝熏行被金銅釘坐車  
楊州蘇小小人道最天斜

詠家醞十韻

獨醒從古笑靈均長醉如今數  
伯倫舊法依傳自杜新  
方要妙得於陳井泉王相  
資重九麴蘖精靈用上寅  
釀糯豈勞吹范

黍撒芻何假漉陶巾常嫌竹葉猶凡濁始  
覺榴花不正真甕揭聞時香酷烈餅封貯  
後味甘辛捧疑明水從空化飲似陽和滿  
腹春色洞玉壺無表裏光搖金盞有精神  
能銷忙事成閑事轉得憂人作樂人應是  
世間賢聖物與君還往擬終身

池鶴二首

高竹籠前無伴侶亂雞群裏有風標低頭  
乍恐丹砂落曬翅常疑白雪銷轉覺鷗鷺

毛色下苦嫌鸚鵡語聲嬌臨風一唳思何  
事悵望青田雲水遙

池中此鶴鶴中稀恐是遼東老今威帶雪  
松枝翹膝脛放花菱片綴毛衣佒徊且向  
籠間宿奮迅終須天外飛若問故巢知處  
在主人相戀未能歸

對酒五首

巧拙賢愚相是非何如一醉盡忘機君知  
天地中寬窄鸚鵡鸞鳳各自飛

蝸牛角上爭何事石火光中寄此身  
隨貪且歡樂不開口笑是癡人  
丹砂見火去無迹白髮詆人來不休  
酒仙相煖熱松喬醉即到前頭  
百歲無多時壯健一春能幾日  
且莫推辭醉聽昌陽關第四聲  
昨日佷眉問疾來今朝收淚弔人迴  
眼前流例君看取且遣琵琶送一杯

僧院花

欲悟色空爲佛事故栽芳樹在僧家細看  
便是華嚴偈方便風開智慧花

老戒

我有白頭戒聞於韓侍郎老多憂活計病  
更戀班行矍鑠誇身健周遮說話長不知  
吾免否兩鬢已成霜

洛橋寒食日作十韻

上苑風烟好中橋道路平蹴毬塵不起潑  
火雨新晴宿醉頭仍重晨遊眼乍明老慵

雖省事春誘尚多情遇客踟躕立尋花取  
次行連錢嚼金勒鑿落寫銀罌府醞常教  
送官娃豈要迎舞腰那及柳歌舌不如鶯  
鄉國真堪戀光陰可合輕三年遇寒食盡  
在洛陽城

快活

可惜鶯啼落花處一壺濁酒送殘春可憐  
月好風涼夜一部清商伴老身飽食安眠  
消日月閑淡冷笑接交親誰知將相王侯

外別有優游快活人

送令狐相公赴大原

六纛雙旌萬鐵衣  
并汾舊路滿光輝  
青衫書記何年去  
紅旆將軍昨日歸  
詩作馬蹄隨筆走  
獵酣鷹翅伴觥飛  
北都莫作多時計  
再爲蒼生入紫微

不出

簷前新葉覆殘花  
席上餘盃對早茶  
好是  
老郎銷日處  
誰能騎馬傍人家

惜落花

夜來風雨急無復舊花林枝上三分落園  
中一寸深日斜啼鳥思春盡老人心莫恠  
添杯飲情多酒不禁

老病

晝聽笙歌夜醉眠若非月下即花前如今  
老病須知分不負春來二十年

憶晦叔

遊山弄水攜詩卷看月尋花把酒盃六事

盡思君作伴幾時歸到洛陽來

送徐州高僕射赴鎮

大紅旆引碧幢旌  
新拜將軍指點行  
戰將易求何足貴  
書生難得始堪榮  
離筵歌舞花叢散  
候騎刀槍雪隊迎  
應笑蹉跎白頭尹  
風塵唯管洛陽城

琴酒

耳根得所琴初暢  
心地忘機酒半酣  
若使啓期兼解醉  
應言四樂不言三

聽幽蘭

琴中古曲是幽蘭  
爲我慙懃更弄看  
欲得身心俱靜好  
自彈不及聽人彈

六年秋重題白蓮

素房含露玉冠鮮  
紺葉搖風鈿扇圓  
本是吳州供進藕  
今爲伊水寄生蓮  
移根到此三千里  
結子經今六七年  
不獨池中花故  
舊兼乘舊日採花船

元相公挽歌詞三首

銘旌官重威儀盛騎吹聲繁鹵簿長後魏  
帝孫唐宰相六年七月葬咸陽

墓門已閉笳簫去唯有夫人哭不休蒼蒼  
露草咸陽壠此是千秋第一秋

送葬萬人皆慘澹反虞駟馬亦悲鳴琴書  
劍珮誰收拾三歲遺孤新學行

卧聽法曲霓裳

金磬玉笙和已久牙牀角枕睡常遲朦朧  
閑夢初成後宛轉柔聲入破時樂可理心

應不謬酒能陶性信無疑起嘗殘酌聽餘  
曲斜背銀釭半下帷

結之

歡愛今何在悲啼亦是空同爲一夜夢共  
過十年中

五鳳樓晚望 六年八月十日作

晴陽晚照濕烟銷五鳳樓高天沈寥野綠  
全經朝雨洗林紅半被暮雲燒龍門翠黛  
眉相對伊水黃金線一條自入秋來風景

好就中最好是今朝

寄劉蘇州

去年八月哭微之今年八月哭敦詩何堪  
老淚交流日多是秋風搖落時泣罷幾迴  
深自念情來一倍苦相思同年同病同心  
事除却蘇州更是誰

送客

病上藍輦相送來衰容秋思兩悠哉涼風  
嫋嫋吹槐子却請行人勸一盃

秋思

夕照紅於燒晴空碧勝藍獸形雲不一弓  
勢月初三鴈思來天北砧愁滿水南蕭條  
秋氣味未老已深諳

酬夢得秋夕不寐見寄

碧簾絳紗帳夜涼風景清病聞和藥氣渴  
聽碾茶聲露竹偷燈影烟松護月明何言  
千里隔秋思一時生

題周家歌者

清緊如敲玉深圓似轉簧一聲腸一斷能有幾多腸

憶夢得

齒髮各蹉跎踈慵與病和愛花心在否見酒興如何年長風情少官高俗慮多幾時紅燭下聞唱竹枝歌

贈同座

春黛雙蛾嫩秋蓬兩鬢侵謀歡身太晚恨老意彌深薄解燈前舞尤能酒後吟花叢

便不入猶自味甘心

失婢

宅院小墻庫坊門帖榜遲舊恩慙自薄前  
事悔難追籠鳥無常主風花不戀枝今宵  
在何處唯有月明知

夜招晦叔

庭草留霜池結冰黃昏鐘絕凍雲凝碧瓊  
帳上正飄雪紅火爐前初炷燈高調秦箏  
一兩弄小花蠻榼二三升爲君更奏湘靈

曲夜就儂來能不能

戲答皇甫監

寒宵勸酒君須飲君是孤眠七十身莫道  
非人身不煖十分一盞煖於人

和楊師臯傷小姬英英

自從嬌駭一相依共見楊花七度飛玳瑁  
牀空收枕席琵琶絃斷倚屏幃人間有夢  
何曾入泉下無家豈是歸墳上少啼留取  
淚明年寒食更沾衣

池邊即事

氈帳胡琴出塞曲  
蘭塘越棹弄潮聲  
何言此處同風月  
薊北江南萬里情

聞樂感鄰

老去親朋零落盡  
秋來絃管感傷多  
尚書宅畔悲鄰笛  
廷尉門前歎雀羅  
綠綺窻空分妓女  
絳紗帳掩罷笙歌  
歡娛未足身先去  
爭奈書生薄命何

白氏文集卷第五十六

白氏文集卷第五十七

律詩 五言 七言 凡九十首

戊申歲暮詠懷三首

窮冬月末兩三日半百年過六七時龍尾  
趁朝無氣力牛頭參道有心期榮華外物  
終須悟老病傍人豈得知猶被妻兒教進  
退莫求致仕且分司  
唯生一女才十二祇欠三年未六旬婚嫁  
累輕何怕老飢寒心慣不憂貧紫泥丹筆

皆經手赤紱金章盡到身更擬踟躕覓何  
事不歸嵩洛作閑人  
七年囚閉作籠禽但願開籠便入林幸得  
展張今日翅不能辜負昔時心人間禍福  
愚難料世上風波老不禁萬一差池似前  
事又應追悔不抽簪

贈夢得

心中萬事不思量坐倚屏風卧向陽漸覺  
詠詩猶老醜豈宜憑酒更寵狂頭垂白髮

我思退脚躡青雲君欲忙祗有今春相伴  
在花前賸醉兩三場

想東遊五十韻 井序

大和三年春予病免官後憶遊浙右數郡  
兼思到越一訪微之故兩浙之間一物已  
上想皆在目吟且成篇不能自休盈五百  
字亦猶孫興公想天台山而賦之也  
海內時無事江南歲有秋生民皆樂業地  
主盡賢侯郊靜銷戎馬城高逼斗牛平河

七百一里沃壤二三州坐有湖山趣行無風  
浪憂食寧妨解纜寢不廢乘流泉石諳天  
竺烟霞識虎丘餘芳認蘭澤遺詠思蘋洲  
菡萏紅塗粉菰蒲綠潑油鱗差漁戶舍綺  
錯稻田溝紫洞藏仙窟玄泉貯恠湫精神  
昂老鶴姿彩媚潛蚪靜閱天工妙閑窺物  
狀幽投竿出比目擲果下獼猴味苦蓮心  
小漿甜蔗節稠橘苞從自結藕孔是誰鏤  
逐日移潮信隨風變棹謳逸夫交烈火候

吏次鳴驕梵塔形疑踊閭門勢欲浮客迎  
攜酒榼僧待置茶甌小宴閑談笑初筵雅  
獻酬稍催朱蠟炬徐動碧牙籌圓盞飛蓮  
子長裾曳石榴柘枝隨畫鼓調笑從香毬  
幕颺雲飄檻簾褰月露鉤舞繁紅袖凝歌  
切翠眉愁絃管寧容歇盃盤未許收良辰  
宜酌酊卒歲好優遊鱸縷鮮仍細蓴絲滑  
且柔飽食爲日計穩睡是身謀名愧空虛  
得官知止足休自嫌猶屑屑衆笑大悠悠

物表踈形役人寰足悔尤蛾須遠燈燭兔  
勿近置罟幻世春來夢浮生水上漚百憂  
中莫入一醉外何求未死癡王湛無兒老  
鄧攸蜀琴安膝上周易在牀頭去去無程  
客行行不繫舟勞君頻問訊勸我少淹留  
雲雨多分散關山苦阻脩一吟江月別七  
見日星周珠玉傳新什鷓鴣念故儔懸旌  
心宛轉東楚意綢繆驛舫粧青雀官槽餽  
紫騮鏡湖期遠汎禹穴約冥搜預掃題詩

壁先開望海樓飲思親履舄宿憶並衾裯  
志氣吾衰也風情子在不應須相見後別  
作一家遊

病免後喜除賓客

卧在漳濱滿十旬起爲商皓伴三人從今  
且莫嫌身病不病何由索得身

長樂亭留別

灞漉風烟函谷路曾經幾度別長安昔時  
蹙促爲遷客今日從容自去官優詔幸分

四皓秩祖筵慙繼二踈歡塵纓世網重重  
縛迴顧方知出得難

陝府王大夫相迎偶贈

紫微閣老自多情白首園公豈要迎伴我  
綠槐陰下歇向君紅旆影前行綸巾髮少  
渾歌仄籃輦肩齊甚穩平但問主人留幾  
日分司賓客去無程

別陝州王司馬

笙歌惆悵欲爲別風景闌珊初過春爭得

遣君詩不苦黃河岸上白頭人

將至東都先寄令狐留守

黃鳥無聲葉滿枝  
閑吟想到洛城時  
惜逢金谷三春盡  
恨拜銅樓一月遲  
詩境忽來還自得  
醉鄉潛去與誰期  
東都添箇狂賓客  
先報壺觴風月知

答崔十八見寄

明朝欲見琴樽伴  
洗拭金盃拂玉徽  
君乞曹州刺史替  
我拋刑部侍郎歸  
倚槽老馬

牧蹄立避箭高鴻盡翅飛豈料洛陽風月  
夜故人垂老得相依

贈皇甫賓客

輕衣穩馬槐陰路漸近東來漸少塵耳鬧  
久憎聞俗事眼明初喜見閑人昔曾對作  
承華相今復連爲博望賓始信淡交宜久  
遠與君轉老轉相親

歸履道宅

驛吏引藤輦家僮開竹扉往時多暫住今

日是長歸眼下有衣食耳邊無是非不論  
貧與富飲水亦應肥

問江南物

歸來未及問生涯先問江南物在耶引手  
摩挲青石笋迴頭點檢白蓮花蘇州舫故  
龍頭暗王尹橋傾鴈齒斜別有夜深惆悵  
事月明雙鶴在裴家

蕭庶子相過

半日停車馬何人在白家慙慙蕭庶子愛

酒不嫌茶

答尉遲少尹問所須

乍到頻勞問所須  
所須非玉亦非珠  
愛君水閣宜閑詠  
每有詩成許去無

詠閑

但有閑銷日都無事  
繫懷朝眠因客起  
午飯伴僧齋樹合陰  
交戶池分水夾階  
就中今夜好風月似江淮

同崔十八寄元浙東王陝州

未能同隱雲林下且復相招祿仕間隨月  
有錢勝賣藥終年無事抵歸山鏡湖水遠  
何由汎棠樹枝高不易攀惆悵八科殘四  
在兩人榮闈兩人閑

答蘇庶子月夜聞家僮奏樂見贈

牆西明月水東亭一曲霓裳按小伶不敢  
邀君無別境絃生管澁未堪聽

偶吟

里巷多通水林園盡不扃松身爲外戶池

面是中庭元氏詩三帙陳家酒一瓶醉來  
狂發詠鄰女映籬聽

白蓮池汎舟

白藕新花照水開紅窻小舫信風迴誰教  
一片江南興逐我慙慙萬里來

訓令狐留守尚書見贈十韻

長慶清風在夔龍燮理餘大和膏雨降周  
邵保釐初嵩少當宮署伊瀍入禁渠曉關  
開玉兔夕鑰納銀魚舊眷憐移疾新吟念

索居離聲雙白鶴行色一籃輦罷免無餘  
俸休閑有弊廬慵於嵇叔夜渴似馬相如  
酒每蒙酤我詩常許起予洛中歸計定一  
半爲尚書

池上即事

行尋甃石引新泉坐看修橋補釣船綠竹  
挂衣涼處歇清風展簟困時眠身閑當貴  
真天爵官散無憂即地仙林下水邊無厭  
日便堪終老豈論年

酬裴相公見寄二絕

習靜心方泰，勞生事漸稀。  
可憐安穩地，捨此欲何歸。

又一首

一雙垂翅鶴，數首解嘲文。  
揔是迂閑物，爭堪伴相君。

答夢得聞蟬見寄

開緘思浩然，獨詠晚風前。  
人貌非前日，蟬聲似去年。  
槐花新雨地，柳影欲秋天。  
聽罷

無他計相思又一篇

得夢得新詩

池上今宵風月涼  
閑教小樂理霓裳  
集仙殿裏新詞到  
便播笙歌作樂章

令狐尚書許過弊居先贈長句

不矜軒冕愛林泉  
許到池頭一醉眠  
已遣平治行藥逕  
兼教掃拂釣魚船  
應將筆硯隨詩主  
定有笙歌伴酒仙  
祇候高情無別物  
蒼苔石笋白花蓮

自題

老宜官冷靜貧賴俸優饒  
熱月無堆案寒天不趁朝  
傍看應寂寞自覺甚逍遙  
徒對盈樽酒兼無愁可銷

答崔十八

勞將白叟比黃公  
今古由來事不同  
我有商山君未見  
清泉白石在曾中

偶詠

禦熱蕉衣健扶羸  
竹杖輕誦經憑檻  
立散

藥遶廊行暝  
槿無風落秋  
蟲欲雨鳴身  
閑當將息病  
亦有心情

答蘇六

但喜暑隨三伏去  
不知秋送二毛來  
更無別計相寬慰  
故遣楊關勸一盃

秋遊

下馬閑行伊水頭  
涼風清景勝春遊  
何事古今詩句裏  
不多說著洛陽秋

偶作

張翰一盃酒榮期三樂歌聰明傷混沌煩  
惱汚頭陲葦冷秋生早堦閑日上多近來  
門更靜無雀可張羅

同崔十八宿龍門兼寄令狐尚書馮

常侍

水碧玉磷磷龍門秋勝春山中一夜月海  
內兩閑人共是幽棲伴俱非富貴身尚書  
與常侍不可得相親

遊平泉贈晦叔

照水容雖老登山力未衰欲眠先命酒暫  
歇亦吟詩且喜身無縛終慙鬢有絲迴頭  
語閑伴閑投十年遲

不出門

不出門來又數旬將何銷日與誰親鶴籠  
開處見君子書卷展時逢古人自靜其心  
延壽命無求於物長精神能行便是真修  
道何必降魔調伏身

勸病鶴

右翅低垂左脛傷可憐風貌甚昂藏亦知  
白日青天好未要高飛且養瘡

臨都驛送崔十八

勿言臨都五六里扶病出城相送來莫道  
長安一步地馬頭西去幾時迴與君後會  
知何處爲我今朝盡一盃

送滕庶子致仕歸婺州

春風秋月携歌酒八十年來翫物華已見  
曾孫騎竹馬猶聽侍女唱梅花入鄉不杖

歸時健出郭乘輶到處誇兒著繡衣身衣  
錦東陽門戶數滕家

雨中訪崔十八

肩舁仍挈榼莫恠就君來秋雨經三宿無  
人勸一盃

拜表早出贈皇甫賓客

一月一迴同拜表莫辭侵早過中橋老於  
君者應無數猶趁西京十五朝

對鏡

三分鬢髮二分絲  
曉鏡秋容相對時  
去作忙官應太老  
退爲閑叟未全遲  
靜中得味何須道  
穩處安身更莫疑  
若使至今黃綺在  
聞吾此語亦分司

勸酒十四首 并序

予分袂東都居多暇  
日閑來輒飲醉後輒  
吟若無詞章不成謠  
詠每發一意則成一  
篇凡十四篇皆主於  
酒聊以自勸故以何  
處難忘酒不如來飲  
酒命篇

何處難忘酒七首

何處難忘酒長安喜氣新初登高第客乍  
作好官人省壁明張榜朝衣穩稱身此時  
無一盞爭奈帝城春

何處難忘酒天涯話舊情青雲俱未達白  
髮遮相驚二十年前別三千里外行此時  
無一盞何以叙平生

何處難忘酒朱門羨少年春分花發後寒  
食月明前小院迴羅綺深房理管絃此時

無一盞爭過艷陽天

何處難忘酒霜庭老病翁暗聲啼蟋蟀乾  
葉落梧桐鬢爲愁先白顏因醉暫紅此時  
無一盞何計奈秋風

何處難忘酒軍功第一高還鄉隨露布半  
路投旌旄玉柱剝葱手金章爛椹袍此時  
無一盞何以騁雄豪

何處難忘酒青門送別多斂襟收涕淚  
蔘馬聽笙歌烟樹灞陵岸風塵長樂坡此時

無一盞爭奈去留何  
何處難忘酒逐臣歸故園赦書逢驛騎賀  
客出都門半面瘡烟色滿衫鄉淚痕此時  
無一盞何物可招魂

不如來飲酒七首

莫隱深山去君應到自嫌齒傷朝水冷貌  
苦夜霜嚴漁去風生浦樵歸雪滿巖不如  
來飲酒相對醉厭厭  
莫作農夫去君應見自愁迎春犁瘦地趁

晚饑羸牛數被官加稅  
稀逢歲有秋不如  
來飲酒相伴醉悠悠

莫作商人去恓惶  
君未諳雪霜行塞北風  
水宿江南藏鎗百千萬  
沉舟十二三不如  
來飲酒仰面醉酣酣

莫事長征去辛勤  
難具論何曾畫麟閣  
祇是老轅門蟣虱衣  
中物刀槍面上痕  
不如來飲酒合眼醉昏昏

莫學長生去仙方  
悞殺君那將蕊上露擬

待鶴邊雲砭砭皆燒藥纍纍盡作墳不如  
來飲酒閑坐醉醺醺

莫上青雲去青雲足愛憎自賢誇智慧相  
軋鬪功能魚爛緣吞餌蛾燹爲撲燈不如  
來飲酒任性醉騰騰

莫入紅塵去令人心力勞相爭兩蝸角所  
得一牛毛且滅嗔中火休磨笑裏刀不如  
來飲酒穩卧醉陶陶

和令狐相公寄劉郎中兼見示長句

日月天衢仰面看尚淹池鳳滯臺鸞碧幢  
千里空移鎮赤筆三年未轉官別後縱吟  
終少興病來雖飲不多歡酒軍詩敵如相  
遇臨老猶能一據鞍

即事

見月連宵坐聞風盡日眠室香羅藥氣籠  
煖焙茶烟鶴啄新晴地雞棲薄暮天自看  
淘酒米倚杖小池前

期宿客不至

風飄雨灑簾帷故竹映松遮燈火深宿客  
不來嫌冷落一樽酒對一張琴

問移竹

問君移竹意如何慎勿排行但聞窠多種  
少栽皆有意大都少校不如多

重陽石上賦白菊

滿園花菊鬱金黃中有孤叢色似霜還似  
今朝歌酒席白頭翁入少年場

偶吟二首

眼下有衣兼有食  
心中無喜亦無憂  
匹如身後有何事  
應向人間無所求  
靜念道經深閉目  
閑迎禪客小低頭  
猶殘少許雲泉興  
一歲龍門數度遊

晴教嗽藥泥  
茶竈閑看科松洗  
竹林活計縱貧長  
淨潔池亭雖小頗  
幽深厨香炊黍  
調和酒牕暖安絃  
拂拭琴老去生涯  
祇如此更無餘事  
可勞心

夜題玉泉寺

遇客多言愛山水逢僧盡道厭囂塵玉泉  
潭畔松間宿要且經年無一人

何處春先到

何處春先到橋東水北亭凍花開未得冷  
酒酌難醒就日移輕榻遮風展小屏不勞  
人勸醉鶯語漸丁寧

勉閑遊

天時人事常多故一歲春能幾度遊不是  
塵埃便風雨若非疾病即悲憂貧窮心苦

多無興富貴身忙不自由  
唯有分司官恰好閑遊  
雖老未能休

寄兩銀榼與裴侍郎因題兩絕

貧無好物堪爲信  
雙榼雖輕意不輕  
願奉謝公池上酌  
丹心綠酒一時傾  
慣和麴蘖堪盛否  
重用鹽梅試洗看  
小器不知容幾許  
襄陽米賤酒升寬

小橋柳

細水涓涓似淚流  
日西惆悵小橋頭  
衰楊

葉盡空枝在猶被霜風吹不休

哭微之二首

八月涼風吹白幕寢門廊下哭微之妻孥  
朋友來相弔唯道皇天無所知  
文章卓犖生無敵風骨英靈歿有神哭送  
咸陽北原上可能隨例作灰塵

馬上晚吟

人少街荒已寂寥風多塵起重蕭條上陽  
落葉飄宮樹中渡流澌擁渭橋出早冒寒

衣披薄歸遲侵黑酒全消如今不是閑行  
日日短天陰坊曲遙

初見劉二十八郎中有感

欲話毗陵君反袂欲言夏口我沾衣誰知  
臨老相逢日悲歎聲多言笑稀

送劉郎中赴任蘇州

仁風膏雨去隨輪勝境歡遊到逐身水驛  
路穿兒店月花船棹入女湖春宣城獨詠  
憲中岫柳憚單題汀上蘋何似姑蘇詩太

守吟詩相繼有三人

福先寺雪中餞劉蘇州

送君何處展離筵  
大梵宮  
大雪天庾嶺  
梅花落歌管謝家柳絮撲金田  
亂從紈袖  
交加舞醉入籃輦  
取次眠却笑召鄒兼訪  
戴只持空酒駕空船

醉中重留夢得

劉郎劉郎莫先起  
蘇臺蘇臺隔雲水  
酒盞來從一百分  
馬頭去便三千里

雪夜喜李郎中見訪兼酬所贈

可憐今夜鵝毛雪引得高情鶴斃人紅蠟  
燭前明似晝青氈帳裏暖如春十分滿盞  
黃金液一尺中庭白玉塵對此欲留君便  
宿詩情酒分合相親

任老

不愁陌上春光盡亦任庭前日影斜面黑  
眼昏頭雪白老應無可更增加

勸歡

火急歡娛慎勿遲  
眼耆老病悔難追  
樽前花下歌筵裏  
會有求來不得時

答王尚書問履道池舊橋

虹梁鴈齒隨年換  
素板朱欄逐日修  
但恨尚書能久別  
莫愁川守不頻遊  
重移舊柱開中眼  
亂種新花擁兩頭  
李郭小船何足問  
待君乘過濟川舟

晚歸府

晚從履道來歸府  
街路雖長尹不嫌  
馬上

涼於牀上坐綠槐風透紫蕉衫

從龍潭寺至少林寺題贈同遊者

山屐田衣六七賢  
寒芳蹋翠弄潺湲  
九龍潭月落杯酒三品松  
風飄管絃強健且宜遊  
勝地清涼不覺過  
炎天始知鶴駕乘雲外  
別有逍遙地上仙

夜從法王寺下歸嶽寺

雙刹夾虛空  
緣雲一徑通  
似從初利下如過  
劔門中  
燈火光初合  
笙歌曲未終  
可憐

師子座昇出淨名翁

宿龍潭寺

夜上九潭誰是伴雲隨飛蓋月隨盃  
明年尚作三川守此地兼將歌舞來

嵩陽觀夜奏霓裳

開元遺曲自淒涼况近秋天調是商  
愛者誰人唯白尹奏時何處在嵩陽  
迥臨山月聲彌怨散入松風韻更長  
子晉少姨聞定恠人間亦便有霓裳

過元家履信宅

雞犬喪家分散後  
林園失主寂寥時  
落花不語空辭樹  
流水無情自入池  
風蕩醺船初破漏  
雨淋歌閣欲傾歌  
前庭後院傷心事  
唯是春風秋月知

和杜錄事題紅葉

寒山十月旦  
霜葉一時新  
似燒非因火  
如花不待春  
連行排絳帳  
亂落剪紅巾  
解駐籃輦看風前  
唯兩人

題崔常侍濟上別墅

求榮爭寵任紛紛  
脫棄金貂祗有君  
散負疏去未爲貴  
小邑陶休何足云  
山色好當晴後見  
泉聲宜向醉中聞  
主人憶爾爾知否  
拋却青雲歸白雲

過溫尚書舊莊

白石青泉拋濟口  
碧幢紅旆照河陽  
村人都不知時事  
猶自呼爲處士莊

天壇峯下贈杜錄事

年顏氣力漸衰殘  
玉屋中峯欲上難  
頂上將探小有洞  
喉中須嚥大還丹  
河車九轉宜精鍊  
火候三年在好看  
他日藥成分一粒  
與君先去掃天壇

贈僧五首

鉢塔院如大師

百千萬劫菩提種  
八十三年功德林  
若不秉持僧行苦  
將何報答佛恩深  
慈悲不昧諸天眼  
清淨無塵幾地心  
每歲八關蒙九

授慇懃一戒重千金

神照上人

心如定水隨形應口似懸河逐病治曾向  
衆中先禮拜西方去日莫相遺

自遠禪師

自出家來長自在緣身一衲一繩牀今人  
見即心無事每一相逢是道場

宗實上人

榮華恩愛棄成唾戒定真如和作香今古

雖殊同一法瞿曇拋却轉輪王

清閑上人

梓潼眷屬何年別長壽壇場近日開應是  
蜀人皆度了法輪移向洛中來

彈秋思

信意閑彈秋思時調清聲直韻踈遲近來  
漸喜無人聽琴格高佷心自知

自詠

隨宜飲食聊充腹取次衣裘亦煖身未必

得年非瘦薄無妨長福是單貧老龜豈羨  
犧牲飽蟠木寧爭桃李春隨分自安心自  
斷是非何用問閑人

分司初到洛中偶題六韻兼戲呈馮

尹

相府念多病春宮容不才官銜依口得奉  
祿逐身來白首林園在紅塵車馬迴招呼  
新客旅掃掠舊池臺小舫宜攜樂新荷好  
蓋盃不知金谷主早晚賀筵開

白氏文集卷第五十七

蓋益不味金... 信... 賢... 開

深容... 山... 宜... 樂... 餘... 致

新... 良... 來... 白... 壽... 國... 年... 功... 盛... 事... 為... 歷... 歷... 如

昨... 祿... 命... 廷... 諫... 春... 官... 奉... 以... 本... 官... 論... 外... 口... 許... 奉

食... 同... 味... 國... 命... 中... 制... 賦... 亦... 蕭... 兼... 德... 呈... 謝

備... 長... 非... 何... 用... 開... 化... 人... 化

越... 終... 讀... 誠... 本... 寧... 等... 林... 等... 香... 樹... 公... 自... 安... 以... 自

奇... 平... 非... 變... 新... 開... 身... 以... 長... 單... 貧... 去... 離... 豈... 意

白氏文集卷第五十八

白氏文集卷第五十八

律詩 五言 七言 凡一百首

洛陽春

洛陽陌上春長在昔別今來二十年唯覓  
少年心不得其餘萬事盡依然

恨去年

老去猶耽酒春來不著家去年來校晚不  
見洛陽花

早出晚歸

早起或因攜酒出晚歸多是看花迴若拋  
風景長閑坐自問東京作底來

魏王堤

花寒懶發鳥慵啼信馬閑行到日西何處  
未春先有思柳條無力魏王堤

嘗黃醅新酎憶微之

世間好物黃醅酒天下閑人白侍郎愛向  
卯時謀洽樂亦曾酉日放籠狂醉來枕麴  
貧如富身後堆金有若亡元九計程殊未

到甕頭一盞共誰嘗

勸行樂

少年信美何曾久春日雖遲不再中歡笑  
勝愁歌勝哭請君莫道等頭空

老慵

豈是交親向我踈老慵自愛閉門居近來  
漸喜知聞斷免惱愁康索報書

酬別微之

臨都驛醉後作

澧頭峽口錢唐岸三別都經二十年且喜

筋骸俱健在勿嫌鬚鬢各皤然君歸北闕  
朝天帝我住東京作地仙博望自來非棄  
置承明重入莫拘牽醉收盃杓停燈語寒  
展衾裯對枕眠猶被分司官繫絆送君不  
得過甘泉

予與微之老而無子發於言歎著在  
詩篇今年冬各有一子戲作二什一  
以相賀一以自嘲

常憂到老都無子何況新生又是兒陰德

自然宜有慶皇天可得道無知一園水竹  
今爲主百卷文章更付誰莫慮鸚鵡雛無浴  
處即應重入鳳凰池

自嘲

五十八翁方有後靜思堪喜亦堪嗟一珠  
甚小還慙蚌八子雖多不羨鴉秋月晚生  
丹桂實春風新長紫蘭芽持盃祝願無他  
語慎勿頑愚似汝爺

自問

年來私自問何故不歸京佩玉腰無力看  
花眼不明老慵難發遣春病易滋生賴有  
彈琴女時時聽一聲

晚桃花

一樹紅桃亞拂池竹遮松蔭晚開時非因  
斜日無由見不是閑人豈得知寒地生材  
遺技易貧家養女嫁常遲春深欲落誰憐  
惜白侍郎來折一枝

夜調琴憶崔少卿

今夜調琴忽有情  
欲彈惆悵憶崔卿  
何人解愛中徽上  
秋思頭邊八九聲

阿淮

謝病卧東都  
羸然一老夫  
孤單同伯道  
遲暮過商瞿  
豈料鬢成雪  
方看掌弄珠  
已衰寧望有  
雖晚亦勝無  
蘭入前春夢  
桑懸昨日弧  
里閭多慶賀  
親戚共歡娛  
膩剝新胎髮  
香繡小繡襦  
玉芽開手爪  
蘇頰點肌膚  
弓冶將傳汝  
琴書勿墜吾  
未能知壽夭  
何

暇慮賢愚乳氣初離殼啼聲漸變難何時  
能反哺供養白頭烏

贈鄰里往還

問予何故獨安然免被飢寒婚嫁牽骨肉  
都來無十口糧儲依約有三年但能斗藪  
人間事便是逍遙地上仙唯恐往還相厭  
賤南家飲酒北家眠

王子晉廟

子晉廟前山月明人聞往往夜吹笙鸞鳥吟

鳳唱聽無拍多似霓裳散序聲

晚起

起晚憐春暖歸遲愛月明放慵長飽睡聞  
健且閑行北闕停朝簿西方入社名唯吟  
一句偈無念是無生

酬皇甫賓客

玄晏家風黃綺身深居高卧養精神性慵  
無病常稱病心足雖貧不道貧竹院君閑  
銷永日花亭我醉送殘春自嫌詩酒猶多

興若比先生是俗人

池上贈韋山人

新竹夾平流  
新荷拂小舟  
衆皆嫌好拙  
誰肯伴閑遊  
客爲忙多去  
僧因飯暫留  
獨憐韋處士  
盡日共悠悠

無夢

老眼花前暗  
春衣雨後寒  
舊詩多忘却  
新酒且嘗看  
拙定於身穩  
慵應趁伴難  
漸銷名利想  
無夢到長安

對小潭寄遠上人

小潭澄見底閑客坐開襟借問不流水何  
如無念心彼惟清且淺此乃寂而深是義  
誰能答明朝問道林

閑吟二首

留司老賓客春盡興如何官寺行香少僧  
房寄宿多閑傾一盞酒醉聽兩聲歌憶得  
陶潛語羲皇無以過

又一首

閑遊來早晚已得一周年嵩洛供雲水朝  
庭乞俸錢長哥時獨酌飽食後安眠聞道  
山榴發明朝向玉泉

獨遊玉泉寺

三月三十日

雲樹玉泉寺肩舁半日程更無人作伴祇  
共酒同行新葉千萬影殘鶯三兩聲閑遊  
竟未足春盡有餘情

晚出尋人不遇

籃輦不乘乘晚涼相尋不遇亦無妨輕衣

穩馬槐陰下自要閑行一兩坊

苦熱

頭痛汗盈巾連宵復達晨不堪逢苦熱猶  
賴是閑人朝客應煩倦農夫更苦辛始慙  
當此日得作自由身

銷暑

何以銷煩暑端居一院中眼前無長物窻  
下有清風熱散由心靜涼生爲室空此時  
身自得難更與人同

行香歸

出作行香客歸如坐夏僧牀前雙草履簷  
下一紗燈珮委腰無力冠歌髮不勝鸞臺  
龍尾道合盡少年登

同王十七庶子李六負外鄭二侍御  
同年四人遊龍門有感而作

一曲悲歌酒一樽同年零落幾人存世如  
閱水應堪嘆名似浮雲豈足論各從祿仕  
休明代共感平生知己恩今日與君重上

處龍門不是舊龍門

池上小宴問程秀才

洛下林園好自知江南境物暗相隨  
淨淘紅粒炊香飯薄切紫鱗烹水葵  
雨滴蓬聲青雀舫浪搖花影白蓮池  
停盃一問蘇州客何似吳松江上時

橋亭卯飲

卯時偶飲齊時卧林下高橋橋上亭  
松影過窻眠始覺竹風吹面醉初醒  
就荷葉上

苞魚鮓當石渠中浸酒餅生計悠悠身兀  
兀甘從妻喚作劉伶

舟中夜坐

潭邊霽後多清景橋下涼來足好風秋鶴  
一雙船一隻夜深相伴月明中

戲和微之答竇七行軍之作 依本

韻

旌鉞從專韃賓僚禮數全瓊龍來要地鷓  
鷓下遼天赭汗騎驕馬青蛾舞醉仙合成

工上作教到各中傳陋卷能無酒貧池亦

江上作散到洛中傳陋巷能無酒貧池亦  
有船春裝秋未寄謾道有閑錢

閑忙

奔走朝行內棲遲林墅間多因病後退少  
及健時還班白霜侵鬢蒼黃日下山閑忙  
俱過日忙狡不如閑

西風

西風來幾日一葉已先飛新霽乘輕屐初  
涼換熟衣淺渠銷慢水踈竹漏斜暉薄暮

青苔巷家僮引鶴歸

題西亭

多見朱門富貴人  
林園未畢即無身  
我今幸作西亭主  
已見池塘五度春

觀游魚

遶池閑步看魚遊  
正值兒童弄釣舟  
一種愛魚心各異  
我來施食爾垂鈎

看採蓮

小桃閑上小蓮船  
半採紅蓮半白蓮  
不似

江南惡風浪芙蓉池在卧牀前

看採菱

菱池如鏡淨無波白點花稀青角多時唱  
一聲新水調傍人道是採菱歌

天老

早世身如風裏燭暮年髮似鏡中絲誰人  
斷得人間事少天堪傷老又悲

秋池

洗浪清風透水霜水邊閑坐一繩牀眼塵

心垢見皆盡不是秋池是道場

登天宮閣

午時乘興出薄暮未能還高上烟中閣平  
看雪後山委形群動裏任性一生間洛下  
多閑客其中我最閑

新雪二首

不思北省煙霄地不憶南宮風月天唯憶  
靜恭楊閣老小園新雪煖爐前  
不思朱雀街東鼓不憶青龍寺後鍾唯憶

夜深新雪後新昌臺上七株松

日高卧

怕寒放懶日高卧臨老誰言牽率身  
夾幕繞房深似洞重裯襯枕暖於春  
小青衣動桃根起嫩綠醅浮竹葉新  
未裹頭前傾一盞何如衝雪趁朝人

和微之任校書郎日過三鄉

三鄉過日君年幾今日君年五十餘  
不獨年催身亦變校書郎變作尚書

和微之十七與君別及曩月花枝之

詠

別時十七今頭白惱亂君心三十年垂老  
休吟花月句恐君更結後身緣

和微之歎槿花

朝榮殊可惜暮落實堪嗟若向花中比猶  
應勝眼花

思往喜今

憶除司馬向江州及此凡經十五秋雖在

簪裾從俗累半尋山水是閑遊謫居終帶  
鄉關思領郡猶分邦國憂爭似如今作賓  
客都無一念到心頭

題平泉薛家雪堆莊

恠石千年應自結靈泉一帶是誰開蹙爲  
宛轉青蛇項噴作玲瓏白雪堆赤日旱天  
長者兩玄陰臘月亦聞雷所嗟地去都門  
遠不得肩舁每日來

和微之道保生三日

相看鬢似絲始作弄璋詩且有承家望誰  
論得力時莫與三日嘆猶勝七年遲我未  
能忘喜君應不合悲嘉名稱道保乞姓號  
崔兒但恐持相並薰葭瓊樹枝

哭皇甫七郎中

志業過玄晏詞華似禰衡多才非福祿薄  
命是聰明不得人間壽還留身後名涉江  
文一首便可敵公卿

晚起

爛熳朝眠後頻伸晚起時煖爐生火早寒  
鏡裏頭遲融雪煎香茗調酥煮乳糜慵饒  
還自哂快活亦誰知酒性溫無毒琴聲淡  
不悲榮公三樂外仍弄小男兒

疑夢二首

莫驚寵辱虛憂喜莫計恩讎浪苦辛黃帝  
孔丘無處問安知不是夢中身  
鹿疑鄭相終難辨蝶化莊生詎可知假使  
如今不是夢能長於夢幾多時

夜宴惜別

笙歌旖旎曲終頭轉作離聲滿座愁  
箏怨朱絃從此斷燭啼紅淚爲誰流  
夜長似歲歡宜盡醉未如泥飲莫休  
何況雞鳴即須別門前風雨冷脩脩

歸來二周歲

歸來二周歲二歲似須臾池藕重生  
葉林鷓再引雛時豐實倉廩春暖  
菁庖厨更作三年計三年身健無

吾土

身心安處爲吾土豈限長安與洛陽  
水竹花前謀活計琴詩酒裏到家鄉  
榮先生老何妨樂楚接輿歌未必狂  
不用將金買宅城東無主是春光

題岐王舊山池石壁

樹深藤老竹迴環石壁重重錦翠斑  
俗客看來猶解愛忙人到此亦須閑  
况當霽景涼風後如在千巖萬壑間  
黃綺更歸何處

去洛陽城內有商山

病眼花

頭風目眩乘衰老祇有增加豈有瘳花發  
眼中猶足恠柳生肘上亦須休大窠羅綺  
看纔辨小字文書見便愁心若不能分黑  
白却應無悔復無尤

早飲醉中除河南尹勅到

雪擁衡門水滿地溫爐卯後煖寒時綠醅  
新耐嘗初醉黃紙除書到不知厚俸自來

誠忝濫老身欲起尚遲疑應須了却口中  
計女嫁男婚三逕資

除夜

病眼少眠非守歲老心多感又臨春火銷  
燈盡天明後便是平頭六十八

府西池

柳無氣力枝先動池有波文水盡開今日  
不知誰計會春風春水一時來

天津橋

津橋東北斗亭西到此今人詩思迷眉月  
晚生神女浦臉波春傍窈娘堤柳絲嫋嫋  
風縹出草縷茸茸雨剪齊報道前驅少呼  
喝恐驚黃鳥不成啼

不准擬二首

藍輦騰騰一老夫褐裘烏帽白髭鬚早衰  
饒病多蔬食筋力消磨合有無不准擬身  
年六十上山仍未要人扶

憶昔謫居炎瘴地巴猿引哭虎隨行多於

賈誼長沙苦小技潘安白髮生不准擬身  
年六十遊春猶自有心情

府中夜賞

櫻桃廳院春偏好石井欄堂夜更幽白粉  
牆頭花半出緋紗燭下水平流閑留賓客  
嘗新酒醉領笙歌上小舟舞袖飄飄棹容  
與忽疑身是夢中遊

府西池北新葺水齋即事招賓偶題  
十六韻

繚繞府西面潺湲池北頭鑿開明月峽決  
破白蘋洲清淺漪瀾急賓緣浦嶼幽直衝  
行徑斷平入卧齋流石疊青稜玉波翻白  
片鷗噴時千點雨澄處一泓油絕境應難  
別同心豈易求少逢人愛翫多是我淹留  
夾岸鋪長葦當軒泊小舟枕前看鶴浴床  
下見魚游洞戶斜開扇踈簾半上鉤紫浮  
萍泛泛碧亞竹脩脩讀罷書仍展碁終局  
未收午茶能散睡卯酒善銷愁簷雨晚初

霽牕風涼欲休誰能伴老尹時復一閑遊  
哭崔兒

掌珠一顆兒三歲鬢雪千莖父六旬豈料  
汝先爲異物常憂吾不見成人悲腸自斷  
非因劔啼眼加昏不是塵懷抱又空天默  
默依前重作鄧攸身

初喪崔兒報微之晦叔

書報微之晦叔知欲題崔字淚先垂世間  
此恨偏敦我天下何人不哭兒蟬老悲鳴

拋蛻後龍眠驚覺失珠時  
文章十帙官三品  
身後傳誰庇  
廢誰

府齋感懷酬夢得

府伶呼喚爭先到  
家醞提攜動輒隨  
合是  
人生開眼日  
自當年  
老歛眉時  
丹砂鍊作  
三銖土  
玄髮看成  
一把絲  
勞寄新詩  
遠安  
慰不聞  
枯樹更生枝

齋居

香火多相對  
葷腥久不嘗  
黃耆數匙粥  
赤

箭一甌湯厚俸將何用閑居不可忘明年  
官滿後擬買雪堆莊

與諸道者同遊二室至九龍潭作

喜逢二室遊仙子狀作三川守土臣舉手  
摩挲潭上石開襟斗藪府中塵他日終爲  
獨往客今朝未是自由身若言尹是嵩山  
主三十六峯應笑人

履道池上作

家池動作經旬別松竹禽魚好在無樹暗

小巢藏巧婦渠荒新葉長慈姑不因車馬  
時時到豈覺林園日日燕猶喜春深公事  
少每來花下得踟躕

六十拜河南尹

六十河南尹前途足可知老應無處避病  
不與人期幸遇芳菲日猶當強健時萬金  
何假藉一盞莫推辭流水光陰急浮雲富  
貴遲人間若無酒盡合鬢成絲

重修府西水亭院

因下䟽爲沼隨高築作臺龍門分水入金  
谷取花栽遶岸行初匝憑軒立未迴園西  
有池位留與後人開

與諸公同出城觀稼

老尹醉醺醺來隨年少群不憂頭似雪但  
喜稼如雲歲望千箱積秋憐五穀分何人  
知帝力堯舜正爲君

水堂醉卧問杜三十一

聞君洛下住多年何處春流最可憐爲問

魏王堤岸下何如同德寺門前無妨水色  
堪閑翫不礙泉聲伴醉眠那似此堂簾幕  
底連明連夜碧潺湲

歲暮言懷

職與才相背心將口自言磨鉛教切玉驅  
鶴遣乘軒只合居巖窟何因入府門年終  
若無替轉恐負君恩

座中戲呈諸少年

衰容禁得無多酒秋鬢新添幾許霜縱有

風情應淡薄假如老健莫誇張興來吟詠  
從成癖飲後酣歌少放狂不爲倚官兼挾  
勢因何入得少年場

雪後早過天津橋偶呈諸客

官橋晴雪曉我我老尹行吟獨一過紫綬  
相輝應不惡白鬚同色復如何悠揚短景  
凋年急牢落衰情感事多猶賴洛中饒醉  
客時時詎我喚笙歌

新製綾襖成感而有詠

水波文襖造新成綾軟絛勾溫復輕晨興  
好擁向陽坐晚出宜披蹋雪行鶴髦毛毳踈  
無實事木繇花冷得虛名宴安往往歡侵  
夜卧穩昏昏睡到明百姓多寒無可救一  
身獨煖亦何情心中爲念農桑苦耳裏如  
聞飢凍聲爭得大裘長萬丈與君都蓋洛  
陽城

早春雪後贈洛陽李長官長水鄭明  
府二同年

獻歲晴和風景新  
銅駝街郭暖無塵  
府庭共賀三川雪  
縣道分行百里春  
朱紱洛陽官位屈  
青袍長水俸錢貧  
有何功德紆金紫  
若比同年是幸人

醉吟

醉來忘渴復忘飢  
冠帶形骸杳若遺  
耳底齋鐘初過後  
心頭卯酒未消時  
臨風朗詠從人聽  
看雪閑行任馬遲  
應被衆疑公事慢  
從前府尹不吟詩

府酒五絕

變法

自慙到府來周歲惠愛威稜一事無唯是  
改張官酒法漸從濁水作醞醐

招客

日午微風旦暮寒春風冷峭雪乾殘碧樽  
帳下紅爐畔試爲來嘗一盞看

辨味

甘露太甜非正味醴泉雖潔不芳馨盃中

此物何人別柔旨之中有典刑

自勸

憶昔羈貧應舉年脫衣典酒曲江邊十千  
一斗猶賒飲何況官供不著錢

諭妓

燭淚夜粘桃葉袖酒痕春汚石榴裙莫辭  
辛苦供歡宴老後思量悔煞君

晚歸早出

筋力年年減風光日日新退衙歸逼夜拜

表出侵晨何處臺無月誰家池不春莫言  
無勝地自是少閑人坐馱推囚案行嫌引  
馬塵幾時辭府印却作自由身

南龍興寺殘雪

南龍興寺春晴後緩步徐吟遶四廊老趁  
風花應不稱閑尋松雪正相當吏人引從  
多乘輦賓客逢迎少下堂不擬人間更求  
事些些踈懶亦何妨

天宮閣早春

天宮高閣上何頻每上令人耳目新前日  
晚登緣看雪今朝晴望爲迎春林鶯何處  
吟箏柱墻柳誰家驪麴塵可惜三川虛作  
主風光不屬白頭人

履道居三首

莫嫌地窄林亭小莫厭貧家活計微大有  
高門鑠寬宅主人到老不曾歸

東里素帷猶未徹南鄰丹旆又新懸衡門  
蝸舍自慙愧收得身來已五年

世事平分衆所知何嘗苦樂不相隨餘杭  
耽酒狂歌客只有樂時無苦時

和夢得冬日晨興

漏傳初五點雞報第三聲帳下從容起窻  
間曉聰明照書燈未滅煖酒火重生理曲  
絃歌動先聞唱渭城

雪夜對酒招客

帳小青氈暖盃香綠蟻新醉憐今夜雪歡  
憶去年人暗落燈花燼閑生草座塵慙慙

報絃管明日有嘉賓

贈晦叔憶夢得

自別崔公四五秋因何臨老轉風流歸來  
不說秦中事歇定唯謀洛下遊酒面浮花  
應是喜歌眉歛黛不關愁得君更有無厭  
意猶恨樽前欠老劉

醉後重贈晦叔

老伴知君少歡情向我偏無論疏與數相  
見輒欣然各以詩成癖俱因酒得仙笑迴

青眼語醉並白頭眠豈是今投分多疑宿  
結緣人間更何事攜手送衰年

睡覺

星河耿耿漏絲絲月暗燈微欲曙天轉枕  
頻伸書帳下披裘箕踞火爐前老眠早覺  
常殘夜病力先衰不待年五欲已銷諸念  
息世間無境可勾牽

白氏文集卷第五十八

開化圖書館

Kaishua library

開化圖書館


Wahua library

開化圖書館

Kaithwa Library

蘭化圖書館

Wanhsia Library




白氏長慶集

二十

開元書館  
Kaohsiung Library

開化圖書

Kaifu Library



**TIFFEN** Color Control Patches

© The Tiffen Company, 2007

Blue Cyan Green Yellow Red Magenta White 3/Color